

中国西南民族史 配布資料

3. 三国・六朝時代の西南民族

3.1 『華陽国志』卷四 南中志

建興三年春，亮南征，自安上由水路入越巂。別遣馬忠伐牂柯，李恢向益州，以韃爲太守廣漢王士爲益州太守。高定元自旄牛、定笮、卑水多爲壘守。亮欲俟定元軍衆集合，并討之，軍卑水。定元部曲殺雍闓及士庶等，孟獲代闓爲主。亮既斬定元，而馬忠破牂柯，李恢破〔夷〕於南中。夏五月，亮渡瀘，進征益州。生虜孟獲，置軍中，問曰：「我軍如何？」獲對曰：「恨不相知，公易勝耳。」亮以方務在北，而南中好叛亂，宜窮其詐，乃赦獲使還，合軍更戰。凡七虜七赦。獲等心服，夷漢亦思反善。亮復問獲，獲對曰：「明公，天威也，邊民長不爲惡焉。」

秋，遂平四郡。改益州爲建寧，以李恢爲太守，加安漢將軍，領交州刺史，移治味縣。分建寧、越巂置云南郡，以呂凱爲太守。又分建寧、牂柯置興古郡。以馬忠爲牂柯太守。移南中勁卒青羌萬餘家於蜀，爲五部，所當無前，號爲飛軍。分其羸弱配大姓焦、雍、婁、爨、孟、量、毛、李爲部曲，置五部都尉，號「五子」，故南人言「四姓五子」也。以夷多剛恨，不賓大姓富豪，乃勸令出金帛，聘策惡夷爲家部曲，得多者奕世襲官。於是夷人貪貨物，以漸服屬於漢，成夷、漢部曲。亮收其俊傑建寧爨習、朱提孟琰及獲爲官屬，習官至領軍，琰輔官將軍，獲御史中丞。出其金、銀、丹、漆、耕牛、戰馬給軍國之用。……

夷人大種曰「昆」，小種曰「叟」。皆曲頭木耳，環鐵裹結，無大侯王，如汶山、漢嘉夷也。夷中有桀黠能言議屈服種人者，謂之「耆老」，便爲主。論議好譬喻物，謂之「夷經」。今南人言論，雖學者亦半引「夷經」。與夷爲姓曰「違耶」，諸姓爲「自有耶」。世亂犯法，輒依之藏匿。或曰：有爲官所法，夷或爲報仇。與夷至厚者謂之「百世違耶」，恩若骨肉，爲其逋逃之藪。故南人輕爲禍變，恃此也。其俗征巫鬼，好詛盟，投石結草，官常以盟詛要之。諸葛亮乃爲夷作圖譜，先畫天地、日月、君長、城府；次畫神龍，龍生夷，及牛、馬、羊；後畫部主吏乘馬幡蓋，巡行安恤；又畫〔夷〕牽牛負酒、齎金寶詣之之象，以賜夷。夷甚重之，許致生口直。又與瑞錦、鐵券，今皆存。每刺史、校尉至，齎以呈詣，動亦如之。

牂柯郡，漢武帝元鼎（二）〔六〕年開。……會公孫述（時）〔據〕三蜀，大姓龍、傅、尹、董氏與功曹謝暹保郡。聞漢世祖在河北，乃遠使使由番禺江出，奉貢漢朝。世祖嘉之，號爲「義郎」。……

平夷郡……營縣 故韃爲郡城也。不狼山出營水，入沅。有野生薛，可食。大姓王氏。

建寧郡，治故庾降都督屯也，南人謂之「屯下」。屬縣〔十七〕。（晉太安二年）〔後〕分爲益州、平樂二郡。（合）〔後分屬〕縣十三，戶萬。去洛五千六百三十九里。有五部都尉、四姓及霍家部曲。……同樂縣 大姓爨氏。

朱提郡，本韃爲南部，孝武帝元封二年置，屬縣四。建武後省爲韃爲屬國。至建安二十年，鄧方爲都尉，先主因易名太守。屬縣五，戶八千，去洛五千三百里。先有梓潼文齊，初爲屬國，穿龍池，溉稻田，爲民興利，亦爲立祠。大姓朱、魯、雷、興、仇、遞、高、李，亦有部曲。其民好學，濱韃爲，號多（士人）〔人士〕，爲寧州冠冕。

永昌郡……呂氏世官領郡，於今三世矣。大姓陳、趙謝、楊氏。

3.2 宋故龍驤將軍護鎮蠻校尉寧州刺史邛都縣侯爨使君之碑（爨龍顏碑）

君諱龍顏，字仕德，建寧同樂〔縣人。其先少昊〕顓頊之玄胄，才子祝融之渺也。清源流而不滯，深根固而不傾。夏后之盛，敷陳五教，勳隆九土，純化〔洽於千〕古，仁功播於萬祀，故乃耀輝西岳。霸王郢楚，子文詔德於春秋，斑朗紹繼於季葉。陽九運否，蟬蛻河東，逍遙中原。斑彪刪定『漢記』，斑固述脩『道訓』，爨暨漢末，菜邑於爨，因氏族焉。姻婭媾於公族，振纓蕃乎王室。迺父肅，魏尚

書僕射、河南尹，位均九例，舒翮中朝，遷運庸蜀，流薄南入，樹安九世，千柯繁茂，萬葉雲興；鄉望標於四姓，邈冠顯於上京。瑛豪繼體，於茲而美。祖晉寧、建寧二郡太守、龍驤將軍、寧州刺史。考龍驤輔國將軍、八郡監軍、晉寧、建寧二郡太守，追諡寧州刺史、邛都縣侯。金紫累跡，朱轍充庭。君承尚書之玄孫，監軍之令子也。容貌瑋於時倫，貞操超於門友，溫良冲挹，在家必聞。本州禮命主簿不就，三辟別駕從事，史正式當朝，靖拱端右，仁篤顯於朝野，清名扇於遐迩。舉義熙十年秀才，除郎中，相〔征〕西鎮，遷南蠻府行參軍，除試守建寧太守。剖符本邦，衣錦晝遊，民歌其德，士詠其風，於是貫伍鄉朝，本州司馬長史。而君素懷慷慨，志存遠御，萬〔里〕歸闕，除散騎侍郎，進無休容，退無慍色，忠誠簡於帝心，芳風宣於天邑。除龍驤將軍、試守晉寧〔太〕守，軺車越斧，金章紫綬，榮戟幢，襲封邛都縣侯。歲在壬申，百六邁豐，州土擾亂，東西二境，凶豎狼暴，緬戎寇場；君收合精銳五千之衆，身伉矢石，撲碎千計，肅清邊隅。君南中磐石，人情歸望，遷本号龍驤將軍、護鎮蠻校尉、寧州刺史、邛都縣侯。……君姿瑛雄之高略，敦純懿之弘度，獨步南境，卓尔不羣雖子產之在鄭，箴以加焉。是以蘭聲既暢，福隆俊嗣者矣，自非愷悌君子，孰能若斯也哉！昊天不吊，寢疾弥篤，享年六十一，歲在丙戌十二月上旬薨。黎庶痛悼，宋夷傷懷，天朝遠感，追贈中牢之饋也。故吏建寧趙次之、巴郡杜長子等仰哀仁德，永慕玄澤，刊石樹碑，褒尚杰烈。其頌曰：

(略)

寧州長子驥弘早終，次弟驥紹、次弟驥暄、次弟驥崇等，建樹此碑。

太明二年歲在戊戌，九月上旬壬子朔，嗣孫碩□、碩□、碩□、碩萬、碩思、碩〔閩〕、碩羅、碩闢、碩俗等立。

匠碑，府主簿益州杜葺子；

文，建寧爨道慶作。

碑陰

府長史建寧爨道文

司馬建寧爨德文泯

錄事參軍武昌郡尉劉觀

功曹參軍建寧孟慶倫

倉曹參軍建寧爨碩登

戶曹參軍建寧周賢

中兵參軍雁門郡王令文

府功曹建寧爨毅

主簿建寧趙道生

別駕建寧爨敬祖

治中晉寧趙世伐

主簿建寧爨德融

主簿建寧孟叔明

西曹益寧楊琮子

西曹晉寧路雄

鎮蠻長史建寧爨世明

司馬建寧爨順靖

錄事參軍建寧毛瑋予

功曹參軍朱提李融之

倉曹參軍牂柯謝國予

戶曹參軍南廣楊道育

中兵參軍建寧爨孫記

蠻府功曹建寧李延祖

主簿建寧孟令孫

主簿建寧孟順德

門下建寧爨連迫

錄事弋陽郡舒征

西曹建寧周令活

戶曹建寧陳世敬

省事安上輿稚圭

書佐建寧孟羅

幹張孫明

錄事孟林

西曹劉道善

戶曹尹仲常

記室張叔熬

朝直張世保

麾下都督王道盈

□□彥頭

□□□汶

□□康

門下張尋

錄事萬敬

西曹尹開

戶曹來叔子

省事李道學

書佐單仲

幹盛慶子

